

OSNOVNI SUD BRČKO DISTRIKTA  
BOSNE I HERCEGOVINE  
Broj: 96 0 K 005533 09 K  
Brčko, 01.02.2010.godine

## U IME BRČKO DISTRIKTA BOSNE I HERCEGOVINE!

Osnovni sud Brčko distrikta Bosne i Hercegovine po sudiji Avdić Muhamedu kao sudiji pojedincu, uz sudjelovanje Bradonjić Nade kao zapisničara, u krivičnom predmetu protiv optuženog Đ. B., zbog krivičnog djela – izazivanje nacionalne rasne i vjerske mržnje, razdora ili netrpeljivosti – iz člana 160. stav 1. Krivičnog zakona Brčko distrikta Bosne i Hercegovine, postupajući po optužnici Tužilaštva Brčko distrikta Bosne i Hercegovine, broj: T 18 0 KT 0000961 09 od 30.12.2009.godine, na javnom pretresu za izricanje kazne održanom 01.02.2010.godine, donio je i u prisustvu tužioca Tepavčević Vladimira, optuženog Đ. B. i njegovog branioca Peranović Bože, advokata iz Brčkog, javno objavio

### P R E S U D U

Optuženi Đ. B., sin M. i majke B. dj. T., rođen ... godine, u Brčkom, nastanjen u mjestu ... Brčko distrikt BiH, Srbin ,državljanin BiH, JMBG...,vozač, pismen, završio SSS školu, neoženjen, bez djece, bez čina, neodlikovan, srednjeg imovnog stanja, neosuđivan, protiv njega se ne vodi drugi krivični postupak,

### K R I V I J E

Što je:

Dana 26.12.2009. godine oko 03,30 sati sjedeći u svom PMV marke Audi A4 reg. oznaka MB-UO-040, koji je bio parkiran u blizini Atik Savske džamije u ulici Konačko brdo Brčko distrikta BiH, zajedno sa Ć. M., Ć. N., Ć. R. i K. P., uzeo papir iz kasete vozila na čijoj prednjoj strani se nalazio obračun 702 št. 1387174 na njegovo ime i tražio od navedenih da na poleđini papira napiše uvredljivi sadržaj, što su isti odbili te povišenim tonom ponovo zatražio od K. P. da to učini što je on i uradio tako što mu je diktirao da napiše sledeći sadržaj „Oj turci vama više biti lijepo neće, mi srbi poručujemo na grobu dobićete k...c, a na cvijeće. Da bogda do ujutro isparili ko ( nerazumljivo za pročitati ) rakija“, a zatim je izašao iz vozila ušao u dvorište Atik Savske džamije i navedeni papir sa pomenutim sadržajem ostavio ispred ulaznih vrata džamije,

dakle, javno izazivao nacionalnu i vjersku mržnju , razdor i netrpeljivost među konstitutivnim narodima koji žive u Brčko distrikt BiH,

čime je počinio krivično djelo – izazivanje nacionalne rasne i vjerske mržnje, razdora ili netrpeljivosti – iz člana 160. stav 1. Krivičnog zakona Brčko distrikta Bosne i Hercegovine, pa ga sud primjenom navedenog zakonskog propisa te primjenom članova

42., 43., 49., 50. tačka b. i 51. stav 1. tačka d. Krivičnog zakona Brčko distrikta Bosne i Hercegovine

## O S U D J U J E

### NA KAZNU ZATVORA U TRAJANJU OD 3 /TRI/ MJESECA.

Na osnovu člana 57. stav 1. Krivičnog zakona Brčko distrikta Bosne i Hercegovine optuženom se u izrečenu kaznu zatvora uračunava vrijeme lišenja slobode od 28.12.2009.godine od 15.45 sati do 29.12.2009.godine do 14.07 sati.

Na osnovu člana 43. stav 7. i člana 48. stav 3. Krivičnog zakona Brčko distrikta Bosne i Hercegovine, uz pristanak optuženog izrečena kazna zatvora u trajanju od tri mjeseca **ZAMJENJUJE SE NOVČANOM KAZNOM U IZNOSU OD 4.500,00 KM /CETIRIHILJADEPETSTOTINAKONVERTIBILNIHMARAKA/.**

Optuženi je dužan novčanu kaznu platiti u roku od pet jednakih mjesečnih rata po pravosnažnosti presude.

Ako optuženi novčanu kaznu ne plati u navedenom roku, ista će se zamijeniti kaznom zatvora računajući pri tome svakih započelih 50,00 KM izrečene novčane kazne za jedan dan zatvora.

Na osnovu člana 188. stav 1. Zakona o krivičnom postupku Brčko distrikta Bosne i Hercegovine optuženi je dužan platiti paušal za rad suda u iznosu od 100,00 KM, u roku od 15 dana po pravosnažnosti presude, a pod prijetnjom prinudnog izvršenja.

## O b r a z l o ž e n j e

Tužilaštvo Brčko distrikta Bosne i Hercegovine optužnicom broj: T 18 0 KT 0000961 09 od 30.12.2009.godine stavilo je na teret optuženom Đ. B. krivično djelo – izazivanje nacionalne rasne i vjerske mržnje, razdora ili netrpeljivosti – iz člana 160. stav 1. Krivičnog zakona Brčko distrikta Bosne i Hercegovine.

Prije održavanja glavnog pretresa Tužilaštvo Brčko distrikta Bosne i Hercegovine i optuženi Đ. B. zastupan po braniocu Peranović Boži advokatu iz Brčko, potpisali su sporazum o priznanju krivice.

Razmatrajući sporazum sud je utvrdio da se do sporazuma o priznanju krivice došlo dobrovoljno, svjesno i sa razumijevanjem, da je optuženi upoznat o mogućim posljedicama uključujući posljedice vezane za imovinsko - pravni zahtjev, oduzimanje imovinske koristi pribavljene krivičnim djelom i troškovima krivičnog postupka, da je razumio da se sporazumom o priznanju krivice odriče prava na sudjenje, te da neće moći uložiti žalbu na krivično - pravnu sankciju koju će mu sud izreći i da postoji dovoljno dokaza o krivici optuženog, zbog čega je prihvatio sporazum o priznanju krivice nalazeći da su se u radnjama optuženog ostvarila sva bitna obilježja krivičnog djela - izazivanje nacionalne rasne i vjerske mržnje, razdora ili netrpeljivosti – iz člana 160. stav 1. Krivičnog zakona Brčko distrikta Bosne i Hercegovine, za koje djelo ga je osudio na kaznu zatvora u trajanju od tri mjeseca i uz pristanak optuženog istovremeno je zamijeno u novčanu kaznu u iznosu od 4.500,00 KM.

Optuženi je krivično djelo počinio sa umišljajem, a kako je sud utvrdio da je i krivično odgovoran za navedeno krivično djelo, oglasio ga je krivim i osudio po Zakonu.

Prilikom izricanja krivične sankcije optuženom, sud je imao u vidu da je optuženi priznao izvršenje krivičnog djela, da do sada nije osudjivan, dok otežavajućih okolnosti na njegovoj strani nije našao.

Imajući u vidu pomenute olakšavajuće okolnosti na strani optuženog i okolnosti pod kojim je krivično djelo počinjeno, sud je ubjedjenja da će se u konkretnom slučaju ublaženom izrečenom kaznom zatvora postići svrha kažnjavanja iz člana 42. Krivičnog zakona Brčko distrikta Bosne i Hercegovine.

Sud je optuženom u izrečenu kaznu zatvora uračunao vrijeme lišenja slobode koje je proveo u pritvoru Policije Brčko distrikta Bosne i Hercegovine, jer je uračunavanje istog obavezno po Zakonu, a na osnovu člana 57. Krivičnog zakona Brčko distrikta Bosne i Hercegovine.

Sud je optuženom izvršio zamjenu kazne zatvora u novčanu kaznu, uz njegov pristanak, a na osnovu člana 43. stav 7. i 48. stav 3. Krivičnog zakona Brčko distrikta Bosne i Hercegovine.

Kako je sud optuženog oglasio krivim zbog počinjenog krivičnog djela, to ga je obavezao da plati paušal za rad suda u iznosu od 100,00 KM, što je srazmjerno dužini trajanja krivičnog postupka, složenosti krivičnog predmeta i imovnom stanju optuženog, a na osnovu člana 188. stav 1. Zakona o krivičnom postupku Brčko distrikta Bosne i Hercegovine.

**Zapisničar,**

Bradonjić Nada

**S u d i j a,**

Avdić Muhamed

POUKA: Protiv ove presude žalba nije dopuštena jer su se stranke i branilac odrekli prava na žalbu nakon objavljivanja presude, tako da je presuda pravosnažna dana 01.02.2010.godine.